

REGIONAL NEWS UNIT  
ALL INDIA RADIO, AGARTALA  
Date: 08-06-2024  
Time: 07:55-08:05 PM Hrs  
BENGALI EVENING BULLETIN

---

Headlines :

- (১) কেন্দ্রে নতুন সরকারের শপথগ্রহণ অনুষ্ঠানের প্রস্তুতি জোরকদমে চলছে ।
- (২) বর্ধিত কংগ্রেস ওয়ার্কিং কমিটি সর্বসম্মতিক্রমে রাহুল গান্ধীকে লোকসভায় বিরোধী দলনেতার ভূমিকা গ্রহণ করার অনুরোধ জানিয়ে একটি প্রস্তাব পাস করেছে ।
- (৩) সিপাহীজলা জেলায় একইসঙ্গে ৩ শ্রমিকের মর্মান্তিক মৃত্যু ।
- (৪) টিসিএ পরিচালিত সদরের আন্তঃস্কুল মেয়েদের টি-২০ ক্রিকেটে আজ দুটি খেলা হয় ।

\*\*\*\*\*

**Swearing :**

কেন্দ্রে নতুন সরকারের শপথগ্রহণ অনুষ্ঠানের প্রস্তুতি জোরকদমে চলছে। রাষ্ট্রপতি দ্রৌপদী মুর্মু নতুন সরকার গঠনের জন্য নরেন্দ্র মোদিকে আমন্ত্রণ জানিয়েছেন। আগামীকাল সন্ধ্যা ৭:১৫ মিনিটে রাষ্ট্রপতি ভবনে শপথ গ্রহণ অনুষ্ঠান হবে। রাষ্ট্রপতি শ্রী মোদী এবং কেন্দ্রীয় মন্ত্রী পরিষদের সদস্যদের শপথবাক্য পাঠ করাবেন।

উল্লেখ্য, শ্রী মোদি গতকাল রাষ্ট্রপতির সঙ্গে দেখা করে নতুন সরকার গঠনের দাবি জানান।

আকাশবাণীর সংবাদদাতা জানাচ্ছেন যে নরেন্দ্র মোদির শপথগ্রহণ অনুষ্ঠানে যোগদানের জন্য প্রতিবেশী দেশগুলির বেশ কয়েকজন নেতাকে আমন্ত্রণ জানানো হয়েছে। পররাষ্ট্র মন্ত্রক জানিয়েছে যে শ্রীলঙ্কার রাষ্ট্রপতি রনিল বিক্রমাসিংহে, মালদ্বীপের রাষ্ট্রপতি ড. মোহাম্মদ মুইজ্জু, সেশেলসের উপরাষ্ট্রপতি আহমেদ আফিফ, বাংলাদেশের প্রধানমন্ত্রী শেখ হাসিনা, মরিশাসের প্রধানমন্ত্রী প্রবিন্দ কুমার জগন্নাথ, নেপালের প্রধানমন্ত্রী পুষ্প কমল দাহল 'প্রচন্ড' এবং ভুটানের প্রধানমন্ত্রী শেরিং তোবগে অনুষ্ঠানে যোগ দেবেন। দিল্লিতে নতুন মন্ত্রিসভার শপথ গ্রহণকে কেন্দ্র করে ব্যাপক নিরাপত্তা ব্যবস্থা গ্রহণ করা হয়েছে।

\*\*\*\*\*

### **Congress :**

বর্ধিত কংগ্রেস ওয়ার্কিং কমিটি সর্বসম্মতিক্রমে রাহুল গান্ধীকে লোকসভায় বিরোধী দলনেতার ভূমিকা গ্রহণ করার অনুরোধ জানিয়ে একটি প্রস্তাব পাস করেছে। আজ নতুনদিল্লিতে এই বৈঠকের পরে একটি সাংবাদিক সম্মেলনে বরিষ্ঠ কংগ্রেস নেতা কেসি বেনুগোপাল বলেছেন যে কংগ্রেস কার্যকরী কমিটি বিশ্বাস করে রাহুল গান্ধীর নেতৃত্ব একটি শক্তিশালী এবং সজাগ বিরোধী দল গড়ে তুলবে।

এর আগে, কংগ্রেস ওয়ার্কিং কমিটির বৈঠকে কংগ্রেস সভাপতি মল্লিকার্জুন খার্গে কংগ্রেসের সমস্ত নবনির্বাচিত সদস্যদের অভিনন্দন জানান। তিনি বলেন, মণিপুরে, যেখান থেকে

কংগ্রেসের ন্যায় যাত্রা শুরু হয়েছিল, সেখানে তারা দুটি আসনেই জিতেছে এবং নাগাল্যান্ড, আসাম, মেঘালয়েও আসন পেয়েছে। তিনি বলেন যে সারা দেশে কংগ্রেস দল গণতন্ত্র ও সংবিধান রক্ষার জন্য জনগণের কাছ থেকে প্রচুর সমর্থন পেয়েছে। শ্রী খার্গে বলেন যে ইন্ডিয়া ব্লকের অংশীদারদের সঙ্গে, দল সংসদে এবং সংসদের বাইরে ঐক্যবদ্ধভাবে এবং একসঙ্গে কাজ করবে।

বৈঠকে দলের বরিষ্ঠ নেতা সোনিয়া গান্ধী, রাহুল গান্ধী এবং দলের সাধারণ সম্পাদক প্রিয়াঙ্কা গান্ধী ভাদ্রা এবং অন্যান্য দলীয় নেতৃবৃন্দ উপস্থিত ছিলেন।

\*\*\*\*\*

**CM :**

মুখ্যমন্ত্রী অধ্যাপক ডা: মানিক সাহা আজ নতুন দিল্লির দ্বারকাংর সেক্টর-১৭ তে নতুন ত্রিপুরা ভবনের বরাদ্দকৃত জমি পরিদর্শন করেন। জমি পরিদর্শনের সময় মুখ্যমন্ত্রী উপস্থিত আধিকারিকদের অত্যাধুনিক ও উন্নতমানের ভবন নির্মাণের নির্দেশ দেন। দ্বারকাংর জমি পরিদর্শনের সময় মুখ্যমন্ত্রীর সঙ্গে নয়াদিল্লির ত্রিপুরা ভবনের আধিকারিকগণ ও সি.পি.ডব্লিউ.ডি'র প্রকৌশলীগণ উপস্থিত ছিলেন। উল্লেখ্য, গত ৭ মার্চ, দিল্লি ডেভেলপমেন্ট অথরিটি নয়াদিল্লির দ্বারকাংর নতুন ত্রিপুরা ভবন নির্মাণের জন্য ২,৯৩০ বর্গমিটার জমি হস্তান্তর করেছে। আগামী কিছুদিনের মধ্যেই এখানে নতুন ত্রিপুরা ভবন নির্মাণের কাজ শুরু হবে। সি.পি.ডব্লিউ.ডি এই ভবনটি নির্মাণ করবে।

তাছাড়া মুখ্যমন্ত্রী আজ নয়াদিল্লিতে টিকেन्द्रজিৎ মার্গের ত্রিপুরা ভবন কমপ্লেক্সের খালি জায়গায় পৃথক একটি বহুতল ভবন নির্মাণ

করা নিয়েও ত্রিপুরা ভবনের আধিকারিক ও সিপিডব্লিউডি'র প্রকৌশলীদের সাথে আলোচনা করেন এবং ভবনটির নির্মাণ কাজ দ্রুত শুরু করার উপর গুরুত্ব আরোপ করেন।

\*\*\*\*\*

### **3 workers died in the well :**

সিপাহীজলা জেলার সোনামুড়া মহকুমার দক্ষিণ তৈবান্দাল এলাকার একটি স্কুলের পরিত্যক্ত কুয়া পরিষ্কার করতে গিয়ে একই সঙ্গে মৃত্যু হয়েছে ৩ শ্রমিকের। মৃত শ্রমিকরা হলেন অশোক ত্রিপুরা, শম্ভু কুমার দেববর্মা ও শুক্রমনি মুড়াসিং। পুলিশ সূত্রে জানা গেছে, তৈবান্দালের নেউরামুড়া জে.বি স্কুলে একটি কুয়া দীর্ঘদিন ধরে পরিত্যক্ত অবস্থায় ছিল। ছাত্রছাত্রীরা যাতে এই কুয়ার জল ব্যবহার করতে পারে তারজন্য এটি পরিষ্কার করা সিদ্ধান্ত নেন বিদ্যালয় কর্তৃপক্ষ। সে অনুযায়ী আজ ৩ শ্রমিক পরিত্যক্ত কুয়াটি পরিষ্কার করার জন্য নীচে নামলে এই মর্মান্তিক ঘটনা ঘটে। খবর পেয়ে ঘটনাস্থলে ছুটে যান মেলাঘর থানার পুলিশ ও অগ্নিনির্বাপক কর্মীরা। মেলাঘর থানার ওসি দেবশীষ সাহা ও সোনামুড়া মহকুমা পুলিশ আধিকারিক শশীমোহন দেববর্মাও দ্রুত ঘটনাস্থলে ছুটে যান। মহকুমা পুলিশ আধিকারিক জানিয়েছেন, মৃত ৩ শ্রমিকের দেহ ময়না তদন্তের জন্য সোনামুড়া মহকুমা হাসপাতালে পাঠানো হয়েছে। সোনামুড়া মহকুমা প্রশাসনের পক্ষ থেকে মৃতদের পরিবারপিছু প্রাথমিক ভাবে ৫ হাজার টাকা করে অর্থ সাহায্য প্রদান করা হয়েছে।

\*\*\*\*\*

**Update Akashvani :**

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তৃত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম ও নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

\*\*\*\*\*

#### **Dhalai District Hospital :**

ধলাই জেলা হাসপাতালের মেডিকেল সুপারিনটেনডেন্ট ডাঃ বিধান ভৌমিক আজ জানিয়েছেন, এই হাসপাতালে কার্ডিয়াক কেয়ার ইউনিট চালু হবার পর থেকে এখন পর্যন্ত এই ইউনিটে মোট ৩৯৬ জন রোগী চিকিৎসা পরিষেবা গ্রহণ করেছেন। এখানে চিকিৎসকরা দ্রুততার সঙ্গে রোগীদের পরিষেবা দেন, যার ফলে রোগীরা সুস্থ হয়ে বাড়ি ফিরতে পারছেন। উল্লেখ করা যেতে পারে, মুখ্যমন্ত্রী অধ্যাপক ডাঃ মানিক সাহা ২০২৩ সালের দোসরা আগস্ট ধলাই জেলা হাসপাতালে এই কার্ডিয়াক কেয়ার ইউনিট উদ্বোধন করেন।

\*\*\*\*\*

#### **School upgraded :**

মাধ্যমিক শিক্ষা দপ্তর জোলাইবাড়ি ব্লকের কালমা সিনিয়র বেসিক স্কুলকে হাইস্কুলে উন্নীত করেছে। দপ্তরের এই সিদ্ধান্তে খুশি এলাকার মানুষ। সমবায় মন্ত্রী শুক্লাচরন নোয়াতিয়া এই সিদ্ধান্তের জন্য মাধ্যমিক শিক্ষা দপ্তর কর্তৃপক্ষকে ধন্যবাদ জানিয়েছেন।

\*\*\*\*\*

### **Vanamohotsav :**

ভারত বিকাশ পরিষদ পূর্ব শাখার উদ্যোগে বিশ্ব পরিবেশ দিবসের অঙ্গ হিসাবে আজ নাগিছড়া আশ্রম পাড়া এলাকায় বনমহোৎসব উদযাপন করা হয়। শিশুদের দিয়ে বৃক্ষরোপণের শুভারম্ভ হয়। অনুষ্ঠানে উপস্থিত ছিলেন গ্রাম প্রধান সমর সাহা, ভারত বিকাশ পরিষদের ন্যাশনাল ভাইস চেয়ারম্যান ধীরেন্দ্র কলই, প্রাক্তন ডিআইজি বলরাম শীল, সভাপতি শিমুল সাহা প্রমুখ। অনুষ্ঠানে উপস্থিত বক্তারা পরিবেশ সুস্থ ও স্বাভাবিক রাখতে গাছ লাগানোর উপর গুরুত্ব আরোপ করেন।

\*\*\*\*\*

### **TSECL-Dharna :**

রাজধানীর বিদ্যুৎ ভবনের সামনে আজ ধর্না কর্মসূচীতে সামিল হলেন TSECL'র সহযোগী সংস্থা ভিশন প্লাসের অধীনে কর্মরত প্রায় দেড়শ জন মতো বিদ্যুৎ দপ্তরের লাইনম্যান ও হেল্পার কর্মীরা। অভিযোগ প্রতিশ্রুতি মোতাবেক বেতন ভাতা বৃদ্ধি না করা এবং ৮ ঘন্টার পরিবর্তে ১২ ঘন্টা কাজ করিয়েও নায্য পাওনা থেকে তাদের বঞ্চিত করা হয়েছে বলে অভিযোগ জানিয়ে তার প্রতিবাদে ধর্না কর্মসূচীতে সামিল হয়ে সমস্যা সমাধানের দাবী জানানো হয়।

\*\*\*\*\*

### **Tree Plantation :**

বিশ্ব পরিবেশ দিবস উপলক্ষে লায়ন্স ক্লাব অব আগরতলা ফেমিনার পক্ষ থেকে আজ রাজধানীর নেতাজি সুভাষ বিদ্যানিকেতন স্কুল মাঠে একটি বৃক্ষরোপণ কর্মসূচির আয়োজন

করা হয়। প্রতি বছরই এই সংস্থা বৃক্ষরোপণ কর্মসূচি পালন করে থাকে। লায়ন্স ক্লাব অব আগরতলা ফেমিনার সম্পাদিকা পায়েল সাহা বিশ্ব উষ্ণায়ন থেকে পৃথিবীকে রক্ষা করতে বৃক্ষরোপণ ও তার রক্ষণাবেক্ষণের আহ্বান জানান।

\*\*\*\*\*

**Ramoji Rao passes away today :**

প্রয়াত হয়েছেন রামোজি রাও ফিল্ম সিটির প্রতিষ্ঠাতা রামোজি রাও। আজ ভোররাতে তাঁর মৃত্যু হয়। মৃত্যুকালে তার বয়স হয়েছিল ৮৭ বছর। তেলুগু মিডিয়া এবং সাংবাদিকতায়ও তাঁর উল্লেখযোগ্য অবদান ছিল। রামোজি রাও ছিলেন খ্যাতনামা ভারতীয় চলচ্চিত্র প্রযোজনা সংস্থা উষাকিরণ মুভিজের প্রধান। তিনি জাতীয় পুরস্কার এবং দুটি ফিল্মফেয়ার পুরস্কার জিতেছিলেন।

রামোজি রাও-এর মৃত্যুতে গভীর শোকপ্রকাশ করেছেন প্রধানমন্ত্রী নরেন্দ্র মোদী। এক শোকবার্তায় তিনি বলেন, রামোজি রাও ছিলেন একজন দূরদর্শী, যিনি ভারতীয় গণমাধ্যমে বিপ্লব ঘটিয়েছিলেন। সাংবাদিকতা ও চলচ্চিত্র জগতে তাঁর সমৃদ্ধ অবদান চিরস্মরণীয় হয়ে থাকবে।

রাজ্যপাল ইন্দ্রসেনা রেড্ডি নাল্লুও আজ রামোজি গ্রুপের প্রধান রামোজি রাওয়ের প্রয়াণে গভীর শোক প্রকাশ করেছেন।

\*\*\*\*\*

**Heatwave :**

রাজধানী দিল্লি-সহ দেশের বিভিন্ন রাজ্যে ফের তাপপ্রবাহের সতর্কতা জারি করল ভারতীয় আবহাওয়া দপ্তর। পঞ্জাব, হরিয়ানা-

চণ্ডীগড়-দিল্লি, উত্তর প্রদেশ, পূর্ব মধ্যপ্রদেশ, গাঙ্গেয় পশ্চিমবঙ্গ, বিহার, ঝাড়খণ্ড ও ওড়িশার বিভিন্ন স্থানে আগামীকাল তাপপ্রবাহের সম্ভাবনা রয়েছে।

\*\*\*\*\*

### **Anti Drug Rally :**

ত্রিপুরা বডি বিল্ডার্স এন্ড ফিটনেস অ্যাসোসিয়েশনের উদ্যোগে রাজধানী আগরতলায় আজ এক এন্টি ড্রাগ রেলী অনুষ্ঠিত হয়। সংস্থার প্রতিষ্ঠা দিবস উদযাপন উপলক্ষে সমাজ সচেতনতামূলক এই কর্মসূচী পালিত হয়। নেশা মুক্ত হোন, যুক্ত হোন ফিটনেস দুনিয়ায় – ওই স্লোগানকে সামনে রেখেই র্যালি ছিল। র্যালিটি আগরতলা শহরের সিটি সেন্টারের সামনে থেকে শুরু হয়ে বিভিন্ন রাজপথ অতিক্রম করে রবীন্দ্রভবন প্রাঙ্গণে এসে শেষ হয়। ভ্রাতৃ-প্রতিম সমস্ত সংস্থার পাশাপাশি বিভিন্ন এনজিও, সংগঠন এবং প্রতিষ্ঠান থেকেও যুবক যুবতীরা এই র্যালিতে অংশ গ্রহণ করেন।

\*\*\*\*\*

### **Women's Cricket :**

টিসিএ পরিচালিত সদরের আন্তঃস্কুল মেয়েদের টি-২০ ক্রিকেটে আজ দুটি খেলা হয়। নরসিংগড়ের পিটিএ মাঠে সকালে আসাম রাইফেলস পাব্লিক স্কুল ৯০ রানে প্রাচ্য ভারতী স্কুলকে এবং দুপুরে একই মাঠে প্রণবানন্দ বিদ্যামন্দির ৯ উইকেটে বড়দোয়ালি স্কুলকে পরাজিত করে। অপরদিকে নরসিংগড়ের পঞ্চায়েত মাঠে বিদ্যাসাগর স্কুল ও নন্দননগর স্কুলের খেলাটি বৃষ্টিতে পরিত্যক্ত হয়।

\*\*\*\*\*

## Weather :

আগামীকাল আকাশ সাধারণত মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। তাপমাত্রা সর্বোচ্চ চৌত্রিশ ডিগ্রী এবং সর্বনিম্ন সাতাশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল চৌত্রিশ ডিগ্রী সেলসিয়াস এবং সর্বনিম্ন চব্বিশ দশমিক এক ডিগ্রী সেলসিয়াস। আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বজ্র বিদ্যুত সহ বৃষ্টি সঙ্গে ঘণ্টায় চল্লিশ থেকে পঞ্চাশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর। এছাড়া উত্তর, উনকোটি এবং ধলাই জেলায় বিক্ষিপ্ত ভাবে ভারী বর্ষণের ও সতর্কতা জারি করা হয়েছে।

\*\*\*\*\*